



DEMOKRAATIT
DEMOKRATERNE

UPA 2017/26
Justus Hansen

Uunga siunnersuut: Ilinniartut sungiusartullu atorfinitsinnerini suliffiit pisortanilu oqartussat inuiaqatigiinni akisussaaffeqarnerat pillugu Inatsisartut inatsisaat nr. xx, xx. xxx 2017-imeersoq.

(Inuussutissarsiornermut, Suliffeqarnermut, Niuernermut, Nukissiuuteqarnermut Nunanullu allanut Naalakkersuisoq)
(Siullermeenera)

Demokraatini, ATASSUT-milu isumaqarpugut innuttaasunik ilinniartitsineq tassaasoq massakkorpiaq uangut politikerit suliassatta pingaarnersarigaat. Ilinniartitaanerup qaffassarnera aqqutigalugu uangut inuiaqatigiittut aningaasarsiornikkut nammineernerulernissatsinnut pingaarutilimmik alloriartussaavugut, tamannalu Demokraatini, ATASSUT-millu isumarput naapertorlugu pisariaqarpoq politikikkut nammiliivinnissaq anguneqassapat.

Tamatumunnga atatillugu pingaaruteqarpoq qularnaassallugu, ilinniartitaanerit pitsaassuseqarluinnarnissaat. Iluaqutaanngilaq inuusuttunik ilinniartussanik amerlasuunik tiguisarutta, tamaasalu ilinniarnerninnut atatillugu sungiusaatigalugu suliffissaannik pissaqartinnagit. Pisariaqanngitsumik ajorsartitsinerit nukinnillu atuilussinnarnerit pissaput. Aaqqiissutaasinnaanngilarli ilinniarfissanik ikilisaaneq, paarlattuanilli isumagisariaqarparput, ilinniartut sungiusartullu suliffissaasa amerlisarnissaat.

Tamanna tunngavigalugu pissusissamisoorpoq ilinniartut sungiusartullu suliffissaannik amingaateqarnerup ajornartorsiutaanera misissussallugu. Tassungali atatillugu eqqaamassallugu pingaaruteqarpoq, ajornartorsiutit tamarmik inatsisiliornikkut aningorneqarsinnaanngimmata. Inatsisit soorunami pivusorsiuussaput aamma inuunermi pivusumi atorsinnaasariaqarpoq.

Uanili inatsisissatut siunnersuummi apeqquserluinnartariaqarparput siunertat ilumut pivusorsiornersut. Soorunami ilinniartut sungiusartulluunniit sulinerisa imaat pitsaasuusariaqarput. Ilinniartut/sungiusartut allatut oqaatigalugu sungiusaatigalugu sulinerminni suliaqartinneqartariaqarput isumalimmik aamma ilinniakkamut tulluuttumik aamma sungiusaatigalugu sulliviup soorunami nukiit pisariaqartinneqartut pigisariaqarpai qularnaarumallugu sungiusaatigalugu sulinerup isumaqarluarnissaa ilinniarfiunissaalu.

Uani inatsisissatut siunnersuummi tamatuma pivusunnigortinneqarsinnaanera pillugu apeqqut ammavoq, Demokraatinili, ATASSUT-milu ataatsimiititaliami sulinissami aggersumi akissutissarsiniarumaarparput.

Aallaqqaammulli Naalakkersuisunut apeqqut manna akeqqarput:



DEMOKRAATIT
DEMOKRATERNE

Inatsisissatut siunnersuut taamatut oqaasertaqartillugu akuerineqassappat taava tamanna qanoq kinguneqassava Namminersorlutik Oqartussani kommuninilu ilinniartut sungiusaatigalugu sulisartut amerlassusaannut? Akissummi ilanngunneqassaaq 2014-mi, ullumikkullu ilinniarnermunut atatillugu sungiusaatigalugu sulisut amerlassusaannut naatsorsuutit aamma ilinniarnermut atatillugu sungiusaatigalugu sulliviit qassit sulisitsisunit pilersinneqassanersut, inatsisissatut siunnersuut maannakkutut iluseqartillugu akuerineqassagalarpat. Ajornannginnerussammat Naalakkersuisut qinnuigineqarput Namminersorlutik Oqartussani naalakkersuisoqarfiit ataasiakkaat kisitsisaataat saqqummiuteqqullugit, naalakkersuisoqarfiit ataaniittut sulliviit ilanngunagit.

Kisitsisinik pineqartunik takorusunnitsinnut pissutaavoq, inuiaqatigiinnut pingaaruteqartup ajornartorsiutip iluarsineqarnaviannginera ilinniartunut sungiusaatigalugu sullivinnik pisortaqarfinnut nuussiinnarnikkut. Allatut oqaatigalugu; suliassat amerlinavianngillat, sungiusaatigalugu sulliviit amerligaluarutsigit. Aamma Demokraatini, ATASSUT-milu isumaqarpugut, ilinniarnermut atatillugu sungiusaatigalugu sulineq pitsaasusariaqartoq isumaqarlunilu.

Tamatuma saniatigut Naalakkersuisut qinnuigissavagut isummerfigeqqullugu, sumiiffinni ilinniartut sungiusaatigalugu sulilersussat amerlinerannut atatillugu isumagisassatigut ajornartorsiutaalersussat qanoq iliorluni aaqqinneqassanersut (sumut inissinneqassappat, sulersissappat, naammattunik suliassaqaassappat, kiap akisussaaffigissavaa sungiusaatigalugu sulinerup isumaqarluarnissaa).

Assersuummik taasilaariarlata: Ullumikkut imaappoq, ilinniartorpassuit soorlu Ilisimatusarfimmi pisortaqarfinni ilinniartutut ikiortitut sulinertik assut nuannaarutigisarpaat. Naalakkersuisut isumaqarnerlutik oqartussaaffiit ilinniartunik ikiortissanik atorfinitsitsisarnermikkut inuiaqatigiinnut iluaqusiisarnerat ingerlaannarsinnaassasoq, siunnersuummi akuerineqassappat ilinniartut sungiusaatigalugu sulisussat annertuumik amerleriatinneqartussaapput?

EU-mik isumaqatigiissutinut qilersorsimagatta aamma Naalakkersuisut qinnuigerusuppagut nalilersoqqullugu, siunnersuut EU-mut isumaqatigiissutinut naapertuunnersoq?

Naalakkersuisut kissaatigaat ilinniarfiit sisamat Nuummiit sinerissamut nuunneqassasut, tassunga ilaalluni niuernermet ilinniarfik Nuummiit Qaqortumut nuukkusunneqartoq. Ilinniarnermut atatillugu sungiusaatigalugu suliffissat nutaat ilarpassui Nuummi pilersinneqartussaammata, pisortat allaffeqarfiisa amerlanersaat taamatullu suliffiit namminersortunit pigineqartut Nuummiimmata, paaserusupparput, kollegiani inissaqarniarneq qanoq sunnerneqassanersoq, niuernerummi ilinniarfinni ilinnialerumaartussat Qaqortumi Nuummilu kollegiani inissaqartariaqarmata. Aamma qularnanngilaq taamaassasoq Saviminilerinermet Ilinniarfimmi ilinniartut eqqarsaatigalugit, siunissami Sisimiuni ineqartalersussat?

Naalakkersuisut qinnuigissavagut uppernarsaqqullugu, siunnersuutit pineqartut marluk kingunerannik kollegiani inissat suli amerlanerusut pilersinneqartariaqassasut - aamma kollegiani inissat amerlanerusut, Naalakkersuisut pilersaaruteqarmata ilinniarfiit suli amerlanerusut sinerissamut nuunniarlugit.



DEMOKRAATIT
DEMOKRATERNE

Inuiaqatigiinnut pingaaruteqarluinnartoq qulequtaq oqallisigigatsigu, pingaaruteqarpoq iternga tikillugu inaarinnisarput. Taamaattumik Naalakkersuisut qinnuigerusuppagut tusarniaanermut atatillugu akissutit allanngortinnagit ataatsimiititaliamut pineqartumik suliarinnittussamut nassitutissagaat - kiisalu siunnersuutaqaqartoq, tusarniaanermut atatillugu nassiussuunneqartoq. Tamatuma saniatigut perusupparput tusarniaanerup nasisunneraniit allannguutaasimasinnaasut allattorsimaffiat. Piffissakillioratta qinnutigissavarput paasisutissat Ataatsimiititaliamit tigoreerneqarsimassasut Ataatsimiititaliap siullermeerluni ataatsimiinnginnerani.

Demokraatinut, ATASSUT-mullu pingaaruteqarluinnarpoq, piaarnerpaamik apeqqutitta sukumiisumik akineqarnissaat, ataatsimiititaliap akissutit aamma isummerfigisinnaaniassammagit.

Siunnersuut Inuussutissarsiornermut Ataatsimiititaliamut innersuupparput suliarilluagassanngorlugu kiisalu Kulturimut, ilinniartitaanermut, Ilisimatusarnermut Ilageeqarnermullu Ataatsimiititaliamut toqqaannartumik tusarniaavissat ilaattut.